

Cuoira, ils 24 da settember 2024

Comunicaziun a las medias

Cuors intensivs da vallader a Müstair

Quist on cun ün nouv record d'annunzchas ed ün program cultural public

Dals 7 als 11 october 2024 spordscha la Lia Rumantscha per incumbenza da l'Uniun dals Grischs cuors intensivs da vallader a Müstair. Quists cuors pussibilteschan a tuot las persunas interessadas d'imprender, d'ameglrar o da perfecziunar la lingua discurrüda e scritta in Val Müstair e da tilla dovrar activmaing. Quist on cun tantas persunas interessadas sco amo mai e darcheu cun ün program cultural avert al public, realisà in collavuraziun cun partenaris in Val Müstair.

Las 63 annunzchas chi sun intant entradas correspuondan cun ün augmoint da raduond 10 % ad ün nouv record d'annunzchas chi conferma il grond interess cha'ls cuors intensivs da vallader svaglian - eir in Val Müstair. In tuot vegnan sports 9 differents cuors: cuors classics cul mez d'instrucziun «In lingia directa», cuors da conversaziun per persunas avanzadas, fin ad ün cuors da lectüra litterara suot l'insaina dal teater popular rumantsch, üna sporta fich interessanta eir per persunas indigenas.

Sper ils cuors intensivs da lingua vain sport l'avantmezdi, avant cha las lecziuns cumainzan, l'uschè nomnà chant avert. Il rom dals cuors intensivs survegnan las participantas ed ils participants ün'invista illa cultura rumantscha, specialmaing quella jaura. Quai nu capita be illas lecziuns in classa, dimpersè eir d'ürant il program accumpagnant cultural facultativ. El as cumpuona da referats, da guidas e da contacts cun persunas rumantschas.

Occurrenzas publicas per üna e scodüna

Eir quist on es l'access ad üna part da quist program cultural avert eir al public interessà. Dimena pussibilitats per star da cumpagnia ed as barattar in rumantsch – tant per indigenas ed indigens sco eir per persunas chi imprendan la lingua.

Las seguaintas occurrenzas sun publicas:

- **Referat «Chalandamarz in Val Müstair»:** Plazin Tschenett preschainta l'üsit dal Chalandamarz e co cha quel vain festagià in Val Müstair, cun ün sguard interessant süll'istorgia ed il svilup da quista tradiziun importanta. E che nu po mancar al Chalandamarz? Precs, las chanzuns! Forsa ün pa our d'chalender, ma d'inviern nu daja oramai cuors intensivs.
- lündeschdi, ils 7-10-2024 a las 17.45 illa chasa da scoula a Müstair

- **Stüa da leer:** ils iniziants da la *Stüa da leer* preschaintan lur sporta per personas indigenas e giasts. Chasper Stuppan preschainta tanter oter parts dal vast s-chazi litterar da sia mamma Madlaina Stuppan, l'autura da «Il bös-ch rumantsch».

mardi, ils 8-10-2024 a las 17.00 illa chasa da scoula a Tschierv

- **Inscunter cul chalger:** cuort avant la finissascha vaina occasiun dad inscuntrar ün dals protagonistis da l'exposiziun «Tantertemp», il chalger Heinrich Ritz chi demonstrescha seis vegl manster e quinta our da sia vita richa d'evenimaints.

gövgia, ils 10-10-2024 a las 14.45 i'l museum Chasa Jaura a Valchava

- **Cafè rumantsch:** Jachen Prevost, magister als cuors intensivs e redacter da musica, preschainta la pagina-web «nossaistorgia.ch» cun fotografias e videos eir da la Val Müstair. Quella saira saja da dudir novas istorgias our da quels documaints vegls ed i's vain a savair co chi's po contribuir svessa a quista collecziun.

gövgia, ils 10-10-2024 a las 19.00 i'l Hotel Alpina a Sta. Maria

Ils cuors intensivs da vallader han lö dals 7 als 11 october 2024 a Müstair. Ulteriuras informaziuns e la pussibilità da s'annunzchar als cuors as chatta sün www.curs.ch. Respunsabel per l'organisaziun dals cuors ed il program accumpagnant es Linard Martinelli, manader fuormaziun da la Lia Rumantscha.